

沒法開始的愛

作者: 大孩子

Powered by [紙言](#)

1. 被迫著成長的孩子

我的故事,是由中一開始.記得當年,小學升中一,我和一班相伴了六年的小學同學,各散東西,派到不同的學校入讀.而我和他們有點不同,或許我成績太差,或許是上天的刻意磨練,又或許是命運安排的相遇.....我被派到了一家離家有一小時多車程的元朗中學.....這代表著什麼?對我來說,這是代表著一個連火車也沒有獨自乘坐過的小孩被時代迫著成長了.由於離家太遠,上學的所有問題,什麼事情,都要自己想方法解決.當時慣性倚賴阿媽的我,心中是十分懼怕離家遠行般的感覺.

升中那年的暑假,阿媽和我,買好書本,校服,完成一本根本不能理解的暑期作業後,暑假就結束,我的童年,也隨著此暑假的結束,正式落幕.

中一的第一天,在校園的小食部,面對完全陌生的環境,面孔,我只是自閉的坐著,等候打鐘上課室.在操場見到其他中一學生,他們都很雀躍地和自己的小學同學相認.大家都興奮地討論著下午要到那裡吃飯,放學後要穿著中學校服回小學找老師,暑期作業完成沒有.這情境對我來說可謂倍感愁悶.過一會,7:50am,鐘聲響起,我便上到自己的班房.由於還未編座位,大家都是隨便挑一個座位來坐.坐我左邊的是阿峰,後面的是阿聲.阿峰見我默不作聲(其實是因5:30am起床,仍然很累),便主動和我說話.於是,我便正式結交到第一位元朗朋友.

峰:你好呀,我叫阿峰,你叫咩名呀?

我:你好呀,我係阿月.

峰:○我,阿月.喂,月哥,我想問呢.....你可唔可以借支塗改液俾我呀?
我睇到人地本暑期作業見到自己個答案錯左想改.同理,可唔可以借埋你果本泥參考下呀?

我:塗改液借俾你無問題,但係我本作業借俾你都無用,我係求其做架咋.

峰:係咪呀?咁謙,借泥睇下.

他拿著我的暑期作業看,呢一刻,阿峰咀型是○.....然後擰轉面找他的朋友阿聲.

峰:聲,你睇下d答案.

阿聲一看,立即爆笑起來.

聲:我聽到你叫阿月呀麻.你都夠薑嗶,本野你若果唔做都算,但你個仆街竟然中文題目就打晒交叉,英文題目叫你寫番d人物,圖畫既英文名,你就係個警察度寫Dog,係部電視寫Car,消防員就Fish?

峰:月哥,你真係諗住咁樣交出去呀?呢劑你仆硬街個嗶.

果一刻,我懶型咁:挑,有咩唔敢,我根本唔想係度讀.

之後我便道出不想在此讀書的原因,因為離家太遠,而且沒有朋友.他們都很明白,要到如此遠上學,的確辛苦,誰也不願.當時我在想,到了中二,我一定轉校,說到做到,才是我的忍道.

過一會,有兩個Miss入課室,一位是Miss Lee,一位是Miss Ng.當時不明白,一個班有多少工作?不也是派回條,收班會費等等,為何要兩個班主任.不過,是Q但,反正都明年轉校,理得你.然後就開始抽號碼調位.結果,阿峰和阿聲調到九丈遠,不過,他們跟我約定,下午一同出去食lunch.我沒有拒絕的理由,畢竟都仲有一年時間要捱過,總要有個照應.而且,附近我根本完全唔識路,於是就和他們去吃飯.而暑期作業,我的確交了,當然給各科老師剷到仆街,之後要重做,幸好阿峰阿聲都記得答案,把答案告之,所以,很快起貨.

就係咁,中一就由阿峰阿聲呢兩個好友陪我渡過.記得有次食lunch的時候,我們買飯盒到阿峰家中吃,他為人很好客,用日本AV(唔記得係邊個女優)加48吋大電視連音響組合招呼我地一邊吃飯一邊看AV.我心想,你條仆街真係唔理隔離鄰舍感受.有阿聲同阿峰陪,總算是苦悶既中一有小小色彩啦.

之不過,因為不能適應每天5:30am起床的辛苦生活,亦不適應全英文的教學,中一成績,到最後,我只能得到全級第五名.算是不錯嗎?當然不是,說的名次是,從尾數上第五名.

考到如此仆街的成績,莫講話轉校,就算升班都成問題.但幸運是,當時Miss Ng的中文科,我曾經在一次UT中文測驗符符碌碌得到全級第二名(今次堅係由頭數落去啦),所以她有信心只要我勤力點,升中二會無問題,之但係,因為Miss Ng其實知我一直都想轉校,於是她就跟我說了一番當頭棒喝,令我中二爆seed讀書的說話:

Miss Ng: 阿月,我知你好想走,唔想係度讀,但係就因為係咁,你就更加要俾心機讀啦,你咁既成績,有邊個肯收你呀?教左你一年,我睇得出你係叻仔,平時又小出聲,好乖(都唔明點解唔出聲就代表乖),你得架,你已經浪費左你一年啦,應承我,你會俾心機讀書,我就幫你用班主任身份,保你上中二,如果唔係,你要讀多年中一.

聽Miss Ng咁講,即是我沒有選擇的餘地,於是就應了一句:好啦,我會俾心機,勤力d架啦.

到了升中二的暑假,因為路程太遠,所以都無約同學出來見面,或者因為平日太自閉,沒主動結識朋友,所以根本亦無人會找我.而在這一個暑假,阿媽死慳死抵,儲了點錢給我去補習社.於是,這個暑假變成一個學習週.而在此暑假,我真的認真起來去溫習課本,預備中二挑戰轉校了.

百無聊賴的日子,一個人很悶,每天溫習,如是者,很快就就開學.阿峰因為成績好,所以能夠脫離我們這個被遺棄的一班,而阿聲則繼續和我在地獄班沉淪.在操場上遇見阿聲.

聲: 點呀阿月,今年本作暑期作業點創作法呀?

我: 屌,無呀,呢個暑假日日補習,係補習社度做晒,今次正常架啦.你睇下.

聲立即一手搶去: 嘩! 屌,正呀喂! 我未做晒,借泥抄.

我: 挑,原來你自己都未做晒,好意思串我.

待他抄完,我們就上課室.又是例牌編位,今次坐在我前後左右的都是女仔.當時心諗,是但啦,男好女好,有何分別.於是就坐下.因為中一是同班,我知幾個女仔的名字,只不過係未曾試過和她們說話.她們一個叫阿翟,一個叫阿晶,一個蕉王.雖然我平日沉默,但係其實我把口好賤,一出口就串人,所以小學時女生都不太喜歡跟我玩.而今次第一個和我說話的是健談的蕉王.關於蕉王名字的由來,

大概好像是因為她每天lunch都會吃一條大蕉,於是同學都說她是King of Banana,中文就是蕉王.她樣子怪怪的,頭髮很曲,硝牙,小小鞋抽面,帶著一幅大金絲眼鏡.

蕉王:阿月,借本暑期作業泥抄丫.

在我仍未答允之際,蕉王已經一手搶去.

我:屌你咩,邊個話借俾你呀.

蕉王:嘩!!我以為你好乖仔,唔多出聲,原來你講粗口架?

我:屌,乖乜春野.拎返泥啦.

蕉王:阿翟,阿晶,救命呀,搶野呀.

阿翟,阿晶是在地獄班中讀書算叻的學生,樣子就不太記得,都是普普通通,正常人一個.

阿翟:你兩個仲細咩,玩埋d低能野,新班主任就泥啦,唔好一開學就俾人罰啦.

我用不屑的眼神看看她們,然後擰回向前伏在枱面.

我:超,廢時理妳地,訓多陣先,抄完放番係我枱面.

經常都訓陣先,因為早上需要5:30am起床,趕坐六時的巴士,而巴士是半小時一班,趕不上的話就必定遲到.每天如是,所以,整個初中生涯,最經常說就是“我訓陣先”.

新班主任到了課室,今次只有一個人,男人,我們稱他為謝Sir.又是例牌收功課,交回條,選班幹事果d啦.完成後,又如常上堂.由於蕉王非常健談,令我上堂睡不了覺.不能睡,唯有聽書,敷衍下蕉王.

蕉王:月,你住咁遠,日日咁起身咪好劫囉?

我:係呀仆街,所以咪要上堂訓覺囉.

蕉王:上堂要聽書架,唔可以訓架.

我:上堂夠唔可以講野啦,你又係咁嘈撻住晒?再煩我要你等陣lunch隻蕉連皮食呀.

因為我中一升中二個暑假都真的下過苦工,所以有時在阿翟,阿晶同蕉王研究題目時我也能加入討論,慢慢,我們變成左一個學習小組.

在某一個小息,有幾位在本學年剛從天堂班殞落至我們地獄班的同學拿出一副中國象棋來下.我本身也略懂一二,但小學後已無人跟我下棋.見有棋局看,我便走過去觀戰.捉棋的是我的朋友阿聲和從天堂殞落的皮蛋,其餘幾位的名字我已忘記.

阿聲:咦!阿月,象棋你都岩咩?唔聽你講既?

我:無,識小小啦,可唔可以下鋪俾我玩下?

皮蛋: 無所謂, 我叫皮蛋呀, 你叫阿月呀呵? 等陣同你捉.

皮蛋是全級數一數二象棋高手, 而我和他之後經常下棋, 棋藝亦大有進步, 後來還能間中打敗他. 慢慢, 我和皮蛋亦因為下棋關係開始熟絡. 有次皮蛋趁我在走廊經行, 奇奇怪怪地將捉埋我去一邊說話.

皮蛋: 阿月, 你同阿翟好熟架?

我: 唔係呀, 做咩呀?

皮蛋: 我見你地成日都好好傾個喎?

我心諭: 你唔係以為我同佢有路下麻?

我: 屌, 傾功課咋麻, 其餘都無乜兩句.

皮蛋鬆一口氣, 然後很直接的說: 你可唔可以幫我問佢受唔受我溝呀?

當時我呆了.

我: 吓...點幫呀呢d野?? 你自己泥啦下麻

皮蛋: 幫下我啦, 至多幫完請你食一個星期lunch.

一個星期lunch, 對於我這個屋企窮得正在領綜援的毒撚來說, 是無可抗拒的條件, 當時的我在想, 可以減輕屋企負擔, 又輕而易舉的事, 沒拒絕的理由, 於是一口答應.

第二日早上, 我在操場撞見阿翟自己一個人, 見機不可失, 我便上前找她.

我有點難為情地: 阿翟..... 你.....得唔得閒呀? 可唔可以行埋一邊? 有d野想問妳.

阿翟像是很開心很跳皮地笑著說: 好呀.

行埋左一邊之後, 無咁多人. 阿翟先開口.

阿翟看著我的頭髮, 鄒鄒眉頭說: 咦! 你睇你, d頭髮飛起晒啦, 其實我見到你d頭髮朝朝都係咁, 你做乜唔整好先出門口呀?

其實我一向對儀容都是零要求, 所以頭髮經常都左飛右飛也不去理, 勁毒!! 但呢個並非重點, 重點是之後阿翟的舉動.

阿翟在自己的書包中拿出一把小小的摺梳, 溫柔的說: 唉, 阿月, 等我幫你梳下個頭啦.

接著阿翟拿著她的梳想替我梳頭. 我嚇得不懂反應, 到回神一刻, 以100%的迴避率, 九秒九彈後閃過她的梳..

我: 喂得, 自己泥, 自己泥, 有心, 有心.

阿翟仍然語帶開心: 咁好啦, 你等陣記得整啦啫. 咁你有咩想同我講姐.

我因為俾佢嚇親, 有d口疾疾: Um.... 丫..... 係咁既..... Um.... 丫.....

阿翟低下頭, 合緊雙唇再問: 咩事姐, 快d講啦

我好快咁講: 皮蛋叫我幫佢問妳鍾唔鍾意佢, 佢想溝你.

果下阿翟當堂由開心表情頓變驚訝, 然後雙眼通紅, 熱淚盈眶.
此刻, 我就心諗, 仆街啦, 係咪講錯左野, 嚇親佢? 等陣佢去搵阿Sir告我咪仆街, 於是即刻凹水沙霖.

我: 對唔住呀, 我幫手問下架咋, 唔一定要受佢溝架, 唔鍾意既, 你唔出聲, 而家行開,
我就幫你傳話話你say no 啦.

阿翟:.....

她依然是熱淚盈眶的看著我. 此時, 我仍然害怕會因為說錯話而被罰.

過一會, 她像已收拾好心情, 就有點惱氣的跟我說.

阿翟: 我係唔會鍾意皮蛋架. 如果我而家話我鍾意既係你, 你會唔會信呀?

雖則古語有云, 有食唔食, 罪大惡極. 但當年中二的我, 連打丁地未懂, 仍是小學雞心態,
覺得男仔係要跟女仔鬥, 不能共存, 戰勝女仔才是男仔的任務, (現在寫起出也覺得好毒). 試問,
此種心態的我, 怎會懂得處理愛情問題.

聽到她問題, 我裝作嬉皮笑臉的, 以很幼稚的答案回應, 試圖緩和緊張氣氛.

我: 車, 我有咩好丫, 人又呢啡, 又摺, 又悶又唔係叻. 皮蛋唔同呀, 佢有打扮, 又叻, 好野泥架.

阿翟以更堅定的眼神, 認真的臉再問我一次.

阿翟: 我問多你一次, 如果我話我鍾意既係你, 你會唔會接受我?

果刻心諗, 做乜迫我呀, 何苦呢.

我強作詼諧地: 大家朋友, 唔講呢d架. 咦! 都夠鐘啦啫, 閃先, 去定廁所, 課室見.

然後, 我以九秒九的速度遠離阿翟.

自始以後, 阿翟再沒有提鍾意我的事. 我亦都無向其他人提起此事. 其實到現在,
我都不明白她當時喜歡我什麼? 我個人又摺, 又悶又口賤, 或許是她和我經常研究功課,
漸漸熟絡而產生錯覺吧. 至於我們的學習小組事後都依然繼續, 直至中二完結.

關於皮蛋, 我就對他說.

我: 皮蛋, 唔好意思呀, 我真係好湊底, 唔敢問, 你都係自己泥啦. 你果一星期既lunch 我都係受唔起架啦.

皮蛋: 屌, 無撚用, 小小野都做唔到.

我: 係啦, 唉, 無計, 你都係自己出馬好d啦

其實我心諗, 你咁有用又唔自己去問, 要搵錢請我去問, 超!!

就係咁, 因為得到阿翟, 阿晶, 蕉王的學習小組幫助, 我中二成績很好, 但亦因為成績進步, 問題又再出現了. 升中三的時候, 我因為有很大進步, 所以由最差既A班, 跳到去左較好的C班, 而阿翟, 阿晶就更直接跳到頂尖的F班. 這個結果, 正正代表我失去了中一, 二的幾位好友阿聲,, 皮蛋, 阿翟, 阿晶. 因為我清楚明白, 位置變了, 各有隊友, 升中二轉班的阿峰就是好例子.

當年升中三, 除左升呢之外, 我亦得到我人生唯一一次的公開獎項, 最佳進步獎. 因為初嘗一點成就, 我開始愛上這間學校. 謝Sir因為知我曾經說過希望升中三轉校, 所以都專聲勸我繼續原校完成中三, 到升中四要揀科時才作去留決定. 或許對於我來說, 中一至中三每天5:30am起床, 無朋友陪出街, 踢波, 打機已經成為習慣. 而遙遠路上的交通意外, 坐車過站, 被友校的壞學生騷擾等等, 我都已經能夠獨立面對. 所以, 中三後, 我和阿媽, 老師都沒再提轉校問題.

中三生活是非常平淡, 沒人再說鍾意我, 沒去結識新的知己朋友, 有的只是全力讀書. 當時自己好像開竅一樣, 讀任何書亦很易入腦, 簡直是如魚得水狀態, 我的中三就在全力讀書之中渡過.

至於我的中二好友皮蛋, 阿聲, 在中三後就沒有再見. 皮蛋到其他學校升讀中四, 而阿聲因為他是圍村仔, 屋企經營豬場, 所以不讀書對他來說是無問題.

記得中二當年都曾經到他的豬場幫手賺點外快幫補家計. 但係因為太辛苦, 工作一日便不做. 早幾年, 從朋友口中得知, 阿聲中三後知道他兄長原來為黑社會中的要員, 於是他隨他兄長闖蕩江湖, 後來更沉淪毒海. 及後, 好像被捉了去戒毒, 信了耶穌. 估不到, 當年的同窗好友會落得如斯田地. 而阿翟, 阿晶, 蕉王都一同進了中四理科班, 原校升讀.

至於我, 因為成績大有進步, 我亦成功升到中四. 中二時地獄班的同學, 大部份人都因為不能升中四, 各散東西. 我和地獄班的同學亦正正式式分別了.

2. 遇上了, 生命的第一位至愛

中四有文科, 商科或理科作選擇, 其實我數學好, 本應是選理科. 但因為中二時候, 有次割老鼠, 個仆街阿聲用刀將老鼠內臟剝成肉醬, 弄得我連lunch都吃不下, 所以我決定不選擇理科, 選擇文科.

此時, 家中情況稍為好轉, 阿爸找到工作, 有每月幾千元收入, 終於不用領綜援. 雖然自己是土生土長的香港人, 領之無愧, 但, 到申請書簿津貼時, 大家交表, 只有你不交, 同學就會問你為何不申請. 那種怕人知道的感覺係有點難受. 此刻, 家中情況雖然略為好轉, 但亦說不上好. 窮撚生活模式依然繼續啓動. 什麼模式?? 就是每天只用十元坐車來回, 不吃早餐, lunch用十元食一碗面或者一碗粥. 因為吃得少, 所以我人比較瘦. 而因為長年不吃早餐, 習慣了, 直至現在也是一樣不吃早餐.

到中四開學第一日, 又一次整班不認識的人, 因為識的同學都升不到中四, 阿翟, 阿晶和蕉王又去了理科班, 我又再自己毒撚一個. 到班房, 隨便找個位坐下, 又睡過覺. 其他同學不像我, 他們有講有笑, 因為本身就是天堂班認識的同學, 全部都是舊友. 而我, 一直睡至新班主任到來的時候就起來. 這次的班主任是Miss Cheng, 教英文, 她幫了我好多, 因為我英文根底奇差, 全賴Miss Cheng 在中四, 五地獄式催谷, 我會考的英文才能取得個合格. 她是我真正尊敬的一位恩師, 至現在, 每次返至母校見到她我亦會九十度鞠躬式她行禮.

說回來, 班務事情, 同樣, 例牌, 調位. 編什麼位置? 不打緊了, 全是陌生面孔. 而且, 因為我們班原來只得六個男生, 其餘係二十四個女生, 基本上, 無可避免都會坐在女生左右隔離. 此事, 在當時以女性為競爭對手的我來說, 是一種困擾.

位置編好, 可能因為這幾年人長高了, 而且班中女生較多, 今次坐到最後一行. 我右邊的是一個叫嘉嘉的女生, 前邊是阿妍, 左邊是阿妮. 果陣望一望她們, 心諗, 超, 普通料, 係得嘉嘉稍為漂亮, 其餘都係不堪入目. 但稍為漂亮, 都不代表什麼, 或許吧.....因為當時從未感受過愛一個人是什麼的感覺.

愛往往是來自一剎那的觸電感覺, 變為喜歡, 再由雙方努力栽培成長. 估不到, 眼前這個簡單不過, 平凡不過的嘉嘉會令我如此刻骨銘心.

我: zzzzzz 訓覺中.

嘉嘉(雙眼閃亮著, 好奇地問): 你好呀, 我叫嘉嘉呀, 無見過你既, 你新轉泥呢間學校架?
我蒙蒙鬆鬆地: 我叫阿月, 我之前都係3C班讀架, 你地天堂班既人, 唔會識我架啦.

然後, 繼續訓, 真係好眼訓. 當時我心想, 我整個中三都可以無朋友之下渡過, 現在可以升中四, 我目標只是考好會考, 升中七, 之後入大學, 搵份好工, 幫屋企脫貧. 朋友? 根本無需要. 因為其實毒撚一個更開心.

見我伏下, 嘉嘉又拍拍我膊頭, 然後又再用她閃亮的眼睛看著我.

嘉嘉: 喂, 唔好訓啦, 係呢, 你咁勁係C班都升到中四, 你讀書有咩心得架?

阿妍 同 阿妮這時一同擰轉頭向我這邊來, 想聽我說什麼.

我: 唔好玩啦, 你地成績咁好, 使乜問我.

於是無理到她們, 亦無再訓, 坐左係度. 因為佢地三個在雞啄唔斷, 好嘈, 好煩, 我睡不了. 三個女人一個墟, 大概就是這情況吧.

過一會.....

妮: 咦, 嘉嘉, 你之前話去左影和服相既, 有未呀? 俾我睇下, 我都想影呀.

妍: 係呀係呀, 我都想影呀遲d, 借泥睇下.

嘉嘉感到難為情.

嘉嘉: 吓..... 丫..... 唔係咁好嗎, 我影得唔靚

妍: 唔怕啦, 拎泥睇下, 你咁靚, 點會影得差架.

我心諗, 唉, 妳地班友真係夠晒八卦, 鍾意咪自己去影, 影左咪知咩效果囉, 係要搵藉口睇人d相.

妮, 阿妍: 嘩, 妳好靚呀!!!

呢一刻, 有女睇, 攞到我都想八卦下. 我偷偷地咁瞄一瞄相片, 然後無出聲. 當時, 突然之間覺得很驚訝, 原來嘉嘉是如此可愛漂亮, 於是再認真地望望嘉嘉. 當時她係著住藍色旗袍校服, 扎起一條馬尾, 皮膚很白哲, 白得晶瑩剔透, 因為被讚靚女關係, 雙頰泛紅, 可愛地笑一笑, 雙眼眯起. 她的笑容就像是糖果一樣, 很甜美, 令人愛不釋手. 加上早上陽光照射, 令她整個人像是天使一樣, 純潔, 無暇. 果一刻, 我定神地看著她, 被她發現了.

嘉嘉: 阿月, 有咩事呀? 做乜定左咁望住我呀?

我(十分尷尬): 無... 無野呀.

就在呢一眼, 我有一種心跳加速的感覺, 而沒想到, 就是一張相, 一個表情, 愛的種子便暗暗地埋下, 慢慢地萌芽. 當時, 我並無想到可否和她進一步發展, 亦從沒想過會我將會認認真真的愛上她. 我只是..... 只想一直坐她旁邊, 享受相聚的時刻.

3.愛的萌芽

自始,我心中的女神除了梁詠琪外,便多了一個嘉嘉.我們因為坐在一起,所以可以經常傾談.最初,阿妍,阿妮,嘉嘉和我一起傾,慢慢,經常是我和嘉嘉兩人傾密計.我們無所不談,從大家家中情況,生活習慣,學習事情,夢想抱負,愛吃什麼,玩什麼.....所有所有都有談及.記得有一次,當天她沒有紮馬尾辮,把頭髮放下.頭髮及至膊頭,這個樣子的她,是一種純潔少女味道的可愛.當天我們是上中史堂時.

嘉嘉又用她的明眸,傻氣樣子望著我.

嘉嘉:其實你咁好,有無諗過搵個女朋友拍拖呀?

當時我才發覺,原來我臉皮很薄,一提到我所愛的女仔便很易會面紅.

我(雙脰通紅):Um...其實...我屋企情況你都知啦,我根本無能力去拍拖照顧到人.所以而家既我,係要全力讀好書,等到讀完書,出泥做野,有能力既時候,我一定會同我鍾意既女仔一齊架.

呢一刻,我以堅定的眼神看著她說這番話.然後她低頭,再甜甜的笑.

嘉嘉:咁又係,而家大家努力考試緊要d,如果拍拖可能會影響學業架.

之後我們繼續睇書.

嘉嘉:係呢,想問你,呢Part會唔會測架?係咪大熱泥架?

我就將個頭挨近嘉嘉看看她的書本.

我:o我,呢part,貞觀之治,每年都大熱泥架.出硬,你肯定啦.

然後,因為挨近左嘉嘉,我聞到她的髮香,然後呆呆的看著她.

嘉嘉又眯起雙眼,傻傻的笑起來.

嘉嘉:咦...做乜又咁呆左望住我呀你?

我:Um...無呀,我覺得你d頭髮好香,聞下啫.
呢個時候,嘉嘉又天真地拿起她的頭髮,自己也聞一聞.

嘉嘉:係喎,我d頭髮真係幾香喎

我:係呀,其實除左頭髮,你個身都有種好特別既香味架.

嘉嘉:係咩?我唔知既,係咩味呀?話我知丫

之後...我還未回神,仍在陶醉於嘉嘉的體香時,一把粗曠的男人聲

XX(好大聲咁講): 唐太宗當年推行政策, 其實都有難度架. 但係點難都唔及你地傾計難呀阿月, 嘉嘉. 你地傾左成堂, 傾夠未呀? 當時全班望向我倆, 嘉嘉即時低頭扮看書. 我不懂反應, 又再紅都面晒.

阿妍 阿妮: 嘩, 阿月, 你做乜面紅呀?? 有d野喎.

然後成班同學: 嗚.....

阿Sir: 唔好嘈啦, 繼續聽書啦.

到大家擰番開, 我倆就低頭, 互相望望, 見到對方的面紅紅, 忍不住又偷偷地笑.

中一至中三時, 我一般3:30pm響起放學鐘就立刻拿起書包跑到車站, 趕坐3:40pm的巴士, 務求最早回家. 因為即使乘坐3:40pm的巴士, 到家都已是5:00pm.

但, 中四後, 我沒有再趕3:40pm這班巴士, 因為嘉嘉是住學校附近, 她回家的路和我去車站的路有部份是相同, 所以, 我每天放學時都和嘉嘉走著那短短的一段路程. 路途雖然很短, 但卻是每天最期盼, 最開心的事. 我覺得, 我好像是為了見嘉嘉而上學. 我們倆人都非常開心, 感覺上, 已像是一對小情侶. 可惜她lunch 要回家吃飯, 否則又可以多一個相處的時間.

我們放學回家的途中, 是經過一段小路, 然後行到一個公園, 再往前一點就是嘉嘉的家. 有時, 我們會到公園坐坐.

我: 不如係個公園度坐陣丫.

嘉嘉: 好呀.

我用紙巾抹抹長椅, 然後給嘉嘉坐下.

我: 妳睇下, d小朋友乜都唔使煩, 又有阿爸阿媽帶住泥玩, 玩到劫就番屋企, 幾好呀

嘉嘉: 我地而家都唔錯丫, 咪一樣無野煩, 係度坐低傾計, 唔係咩?

我深深作了一個深呼吸, 對此句說話感到十分慨嘆. 嘉嘉見我有點慨嘆, 把手搭在我的膊上.

嘉嘉: 我都明你情況既. 如果有咩野要搵人傾, 你咪同我講囉, 我一定會同你分擔架.

她的說話, 給了我一種舒緩作用. 只可惜對我來說, 輸在起跑線, 貧窮, 是一種原罪, 現時的我是無力解決. 但得到嘉嘉的安慰, 總算是苦中的一點甘甜.

我: 嘉嘉, 多謝妳.

我們坐在日落斜照的公園, 看著小朋友玩耍, 樹木欣欣向榮, 微微的涼風吹送. 我身邊的中是嘉嘉, 此刻的感覺很溫暖, 內心的空虛像被填滿, 所有的煩惱, 全被拋掉. 可能此種就是幸福, 浪漫的感覺, 我希望永遠能和嘉嘉一起, 每天沐浴在這感覺之中.

某月, 嘉嘉生日, 這是我認識她後, 她的第一個生日. 我決定要買點禮物給她. 因為自己是窮撙, 又不想增添屋企負擔, 所以, 我將我的lunch預算, 由每天十元, 減至五元.

當年五元可以在七仔買個杯面了, 口渴便可以以在學校水機喝水.

辛辛苦苦, 捱了兩星期的杯面, 儲到了五十元. 我每天都在想, 五十元, 唔算多錢, 可以買什麼較有意義的東西給她呢? 買文具? On9, 小學生咩. 買銀包? 買錶? 五十元? 沒可能吧. 在街上, 一個人行了一會, 見到有間手飾店, 很多少女在裏頭揀手飾. 當時就諗, 咁多女係度, 應該有好多女仔鐘意既野, 話唔定有野岩啫. 於是我就走入鋪內看看.

老闆娘: 隨便睇㗎. 有咩幫到你架?

我: 我睇睇先.

老闆娘: 好, 隨便.
過一陣...

老闆娘: 送俾女朋友仔呢?

我(又面紅):.....

老闆娘: 揀條手鍊啦不如, 呢條新番架, 等佢日日掛住你㗎麻

我心諗, 係啫, 老闆娘真係有計啫. 然後好開心咁問: 咁幾錢呀?

老闆娘: 好平咋, 六十蚊.

我(即時Dup晒): 咁唔使啦唔該.

老闆娘: 唉, 後生仔, 睇岩計平d你啦

我拿出我所有的錢: 我得五十蚊咋.

老闆娘(好好笑容): 算啦十蚊, 俾埋你啦. 多d泥幫襯呀.

我開心到彈起: 一定, 一定.

到了她的生日, 小息時, 我將禮物收在背後, 帶了嘉嘉走到一旁.

我: 嘉嘉, 今日妳生日, 生日快樂呀.

嘉嘉很開心, 報以她的燦爛笑容.

嘉嘉: 多謝呀, 你又記得既.

我: 妳生日啫, 我點會唔記得呀. (雖然而家唔睇佢Facebook的話都唔記得) 我買左d野送俾妳呀, 妳睇下鍾唔鍾意.

嘉嘉開心地拿了小小的禮物袋, 小心地拆, 怕弄破包裝. 一拆開, 見到是手鍊, 她露出白白的牙齒, 眯起雙眼, 向我報以一個可愛的微笑..

嘉嘉: 多謝你呀阿月, 我好開心, 條手鍊好靚呀.

然後, 我握著她的手替她將手鍊帶起. 然後, 我裝作有型地看著她.

我: 妳鍾意就好啦, 咁你要日日都掛住我.....條手鍊啦喎.

嘉嘉, 面紅紅, (低頭)甜甜的笑了一笑.

之後我地就一齊回課室上堂.

往後日子, 我有時都會用有限金錢, 做些小禮物送俾嘉嘉, 比如當年最平, 最受歡迎的飲管花, 飲管星星. 我買一扎飲管回家, 研究如何摺時, 我阿媽問.

媽: 月, 做乜買咁多飲通番泥呀? 去麥當勞拎咪得囉.

我: 呢d飲管係用泥摺野用架, 唔係用泥飲野架.

媽: 咁你用泥摺咩呀?

我: 關你鬼事咩.

媽: 睇你個衰樣都係用泥追女仔啦

我:

我心諗, 仆街, 真係乜都瞞佢唔住, 不過老實講, 我果陣咁既衰樣, 估到又有幾出奇丫. 本來諗住阿媽會話屋企好窮叫我唔好拍拖, 結果, 佢講左句係當時我覺得好爆既說話.

媽: 岩既, 你都大啦, 係要拍下拖既. 不過你記得, 做野起泥要帶套呀, 唔係生左個仔出泥, 屋企咁窮, 照顧唔到架.

我: 屌, 痴撚線啦你, 唔係呀, 無拍拖呀.

於是就繼續研究點摺星星同花. 摺好左之後, 我將d星星入落個樽度, 再插d花上去, 拎返學校送俾嘉嘉. 嘉嘉見到笑得好開心, 真係好, 又可以見到佢甜絲絲的笑容.

嘉嘉: 多謝你呀, 做乜無端端買咁貴野俾我呀?

我: 我自己摺架, 唔係好貴咋. 最緊要你鍾意.

嘉嘉望住樽星星同花, 繼續甜絲絲咁笑. 當時雖然左右隔離都有其他同學, 但仿佛世界只有我們兩人. 就係呢個時間, 阿研同阿妮擰過來看到樽星星.

研: 嘩, 好sweet呀, 訂情信物呀?

我 同 嘉嘉又面紅紅:

妮: 我又要, 俾樽我

我: 頂, 你收皮啦, 自己去買啦.

之後, 我和嘉嘉的緋聞就開始俾人傳開, 令到嘉嘉好避忌. 雖然避忌, 但在我生日時, 她也有去買一盒朱古力給我做生日禮物. 什麼朱古力? 我已經唔記得了, 但係對於一個毒撚來說, 收到心愛的人一盒朱古力絕可以媲美老豆老母生日送俾你一部PS3加GTA5.

嘉嘉(神神秘秘地走過來): 喂喂

我: 做咩呀?

嘉嘉: 生日快樂呀!!

因為無人會同我慶祝, 所以中學時我通常都不記得自己生日. 我就如夢初醒般.

我: 係喎, 今日我生日喎, 我都唔記得左添. 多謝妳呀.

嘉嘉: 我有野送俾你呀, 你估下咩泥?

我: 唔知喎, 送妳自己俾我呀?

她用手敲了我額頭一下.

嘉嘉: 咦, 口花花啦你, 你就想呀.

之後她就拿出一盒朱古力.

我: 多謝妳呀, 可唔可以而家拆泥食呀我?

嘉嘉: 好呀你拆啦.

然後, 我們坐在操場, 一起吃著這盒甜味的朱古力.

中四很快就完, 由於當時嘉嘉會經常問我功課, 所以我除了每天都享受著和嘉嘉開心甜蜜學習時光外, 亦都有爆Seed 溫習, 因為我要將我完美一面給嘉嘉看, 等她覺得我好叻. 呢一刻我終於知道, 點解我以前讀書咁唔上心, 咁唔入腦, 原來因為我未找到真正讀書的理由. 現在的我, 係為著愛嘉嘉而讀書, 所以, 如何頭昏腦脹, 如何倦極都不會辛苦. 最重要是, 中四大考, 我竟然在這天堂班是全班第三名. 我阿媽當然開心到彈起啦, 而嘉嘉亦都覺得好開心. 到此, 我中四甜蜜時光, 很快就完結. 我未試過有一種覺得點解學期咁快完而覺得惋惜既感覺, 竟然, 係識左嘉嘉之後, 時間好似逝去得特別快.

當年我並無電腦, 所以電話就是唯一溝通工具. 只可惜, 嘉嘉屋企人不許她講電話, 能夠溝通的方式, 除左上學見面, 基本上是無. 而中四升中五的暑假, 其實並無真正的放假, 每天都要補課. 但補課對我來說, 即係可以見到嘉嘉, 補課正呀!!! 當時, 我地同樣有繼續上堂談話, 放學一齊行. 就係咁, 到左中五.

中五時間只有半年左右, 很短暫, 而最令我覺得仆街的事就是“調位”. Miss Cheng話因為新一年,

我地需要重新編座位. 當時心裡面想, 千祈要將我和嘉嘉編在一齊坐, 我地交流方式最多就是坐在一起上課的時間, 我不想沒有她坐在我身旁. 但結果是, 我和嘉嘉隔到無雷公咁遠. 事後才知, Miss Cheng知我和她經常談話, 怕我影響到嘉嘉成績, 所以把我們分開. 諗落, 也對, 快將會考, 如此不留心, 可能會很大影響. 而當時, 可能因為調了位, 坐嘉嘉身邊的女仔經常以我們的關係來開她玩笑, 所以, 她都變得很避忌, 開始避開我, 放學有時也不與我同行.

我明白, 群眾壓力, 對於我這個一向理得你死的毒撻來說是無作用, 但係對於嘉嘉, 一個年紀小小的少女來說, 就好像給人誣蔑了, 否定了她人格. 而當時, 我就想, 等我會考後, 再找嘉嘉說清楚.

如是者, 中五的半年, 我和嘉嘉為免受人蜚語, 關係已經沒有中四時候那麼密切. 只是間中傾談, 問問功課.

4.對不起, 都怪我太沒勇氣

時間過得很快, 到了中五會考. 我在中五最後上學的一天, 鼓起勇氣去拿嘉嘉電話號碼.

我: 嘉嘉呀, um.....不如咁丫. 我地, 交換電話丫. 等到考完會考, 我想約妳出泥行下.

嘉嘉: 好呀, 不過你唔好夜晚打泥嗰, 夜晚阿爸同媽咪係度, 我唔可以聽電話架.

我 (我手放到額頭, 做出一個敬禮手勢): Yes Madam!!

最後一天的中五, 估不到是很平淡的渡過. 對我來說當天最大的意義是拿到嘉嘉電話. 因為嘉嘉答應暑假陪我出街, 燃點了點點的希望.

我抱著這期盼的心情, 很快捱過了枯燥的會考. 然後, 我打電話給嘉嘉.

電話接通.....DO...DO...DO...有把女仔聲聽電話: 喂.

我: 喂, 你好呀, 我想搵嘉嘉架.

嘉嘉(疑惑地): 我係呀, 你係??

我: 我呀, 我係阿月呀.

嘉嘉(開心地): 喂, 好耐無見啦嗰, 你考成點呀?

我: 唔知呀, 盡左力架啦, 睇個天啦.

嘉嘉: 唉, 都係既, 盡左力, 唯有等啦.

我: 係呢, 妳記唔記得, 我地講好左考完試出泥行下架?

嘉嘉(扭扭擰擰): 吓? 係咩? 我無印象嗰, 邊個同你講架? 你係咪記錯左約第二個女仔咋?

我: 咁呀, 可能真係記錯啦, 可能我約果個係阿研呀, 唔好意思呀

嘉嘉(吃醋地): 作死你呀, 你試下約第二個女仔丫

我: 講笑咋, sorry 囉, 我真係想約妳呀.

嘉嘉: 我知, 玩下姐. 咁出泥有咩做呀?

我: Um... 我都要想幫我細路去買中學書, 不如咁丫, 今個星期六1:00pm, 我去元朗搵妳, 一齊食餐lunch, 之後行街買書丫.

嘉嘉: 好呀. 不過你d頭髮, 記得執好d先出泥嗰, 唔好呢度一忽飛起, 果度一忽飛起嗰.

我: 放心, 而家唔係番學, 我可以用gel, 唔會飛泥飛去既.

嘉嘉: 咁好啦, 星期六見啦.

我: 一言為定.

嘉嘉: 好啦, bye bye.

我: bye bye.

懷著期待的心情, 我一邊搵暑期工, 一邊等著星期六的到來. 我期盼著我苦候了兩年的戀愛, 可以在這星期六正式開始. 我已經忘記所有現實問題, 包括家中的貧困問題.

然後, 我就同阿媽講.

我: 阿媽, 我星期六去元朗幫細佬買書呀, 你俾錢我得啦, 你今年可以抖下啦.

媽: 係啫, 細佬都升中啦啫, 又要買書, 又一大筆錢要使啦.

然後, 她把錢和書單給我後再說: 之後都唔知點算, 你地個個都開始升中, 升中學, 唔似小學, d野太深, 我教唔到. 你地都要補習, 買書, 車費, 飯錢. 我又要睇住屋企唔可以做野. 或者必要時我就問姨媽借錢啦. 唉, 你地生生性性, 讀好d書, 出來搵錢呀.

呢件事, 突然提醒左我, 我現在有的一切, 都是要倚靠屋企支持, 包括車錢, 食飯, 衣服, 甚至我儲lunch錢買來的區區五十元手鍊, 其實都係家中的錢. 沒有物質的支持, 我還有甚麼資格去愛? 之後幾天, 我都在苦思這個問題.

到左星期六, 我約好嘉嘉在她樓下等著. 嘉嘉今天穿著一件淺藍色小背心, 但內裏穿著一件白色T-shirt, 下身穿著牛仔褲, 更刻意的化了一點妝, 塗了點唇彩. 頭髮是放下, 及膊. 身上傳來一股我久違了的清新體香. 當時我呆呆的望著面前的嘉嘉.

嘉嘉(笑笑地): 傻佬, 做乜又呆左咁望住我呀?

我(又面紅啦): 無.....無呀.....妳.....今日好靚呀.

嘉嘉: 今日先靚咋咩?

我: 唔係, 日日都靚, 今日特別靚.

嘉嘉: 算妳啦. 而家去邊先呀?

我: 都成點鐘, 我地去千色果頭食野先丫, 食哈迪斯好無呀?

嘉嘉: 好呀, 我無所謂.

然後, 我們一邊傾談考試如何, 呢個暑假將會如何渡過? 若果考不上中六又會如何? 傾了很多很多, 像要把我們中五收起了的話都全部說夠. 只是, 一餐飯的時間太短, 不夠我們去談. 吃完後, 行出哈迪斯.

天陰陰，開始下雨，嘉嘉並無帶雨傘，我便拿出我背包中的縮骨遮撐起，一同沿教育路步向大坑渠的平價書店。由於雨傘不大，我們二人靠得前所未有的貼近。一邊行，一邊欣賞著嘉嘉的可愛臉容，一邊聞聞她的體香，髮香。諗落很變態，痴漢一樣。但當時我倆心裏是甜蜜的。貼得太近，可能有點不習慣，大家也沒有說話。

到買完書後，雨已經停了。我便收起雨傘。我們開始越行越近，感覺是嘉嘉等著我拖她的手，開口說聲我愛妳一樣。然後我們行到一個小水灘前，我倆都低頭，停下，相信，嘉嘉當時是想我拖著她的手，一同跨過這面前的小水灘，一同跨到彼岸，正式展開我倆的新生活，一同去追尋我倆的幸福未來。

然而，當時的我突然間停下，思絮很亂。

小水灘對岸的未來，真的是幸福嗎.....我開始懷疑自己，不再相信自己的能力。然後想起，這幾天在苦思著的憂慮。我感到點害怕，若果，我倆的故事是在現在開始，我能否給她幸福呢？

或許，我根本負擔不起愛的代價，我更不能將我拍拖的快樂加諸於我家人的痛苦之上。我心中想的是，我.....現在的我，未有能力和妳一同跨進彼岸.....

我沉沉的低下頭：對唔住呀，嘉嘉！

嘉嘉(含糊地說)：點解唔拖手呀？

我：.....ㄚ.....我.....咩話??

嘉嘉(改了口)：你做乜同我講對唔住呀？

當時的我百般無奈，心中有很多很多的憂慮。不知從何說起。

我：對唔住呀，我注定左要行一條好難行既路。我唔想你辛苦行呢條路呀。

然後，我獨自跨過這小水灘的對岸。我諗正常人都不會明白我這說話的意思，何況當時還是天真的嘉嘉。

嘉嘉(很失望)：唔緊要啦，落雨姐，無人估到既，唔關你事架..

我想著，其實我恨不得衝到妳面前，拖著妳的手。向妳訴說出所有內心我對妳感覺。只可惜，現實的我，卻是如此的無能為力。我只希望，妳可以一直等，等到有朝一日，我可以正正式式地和妳再一次行經歷現在的一刻。

嘉嘉，可以嗎？妳會一直等我嗎？

嘉嘉(心情一沉)：.....都晏啦，番屋企啦。

我：好啦，我送你番去。

然後，我送左嘉嘉番屋企。當時，我好痛恨自己點解唔出生係一個富裕家庭，點解會想愛，但係唔敢放開去愛？係咪愛情唔應該太理智？唔應該想得太多？但我的的確確過唔到自己果關。

此日之後,我非常之消沉.但想起,若果今次會考不成功,以後總要過活,謀生.所以,我要裝備自己,等有能力後,再向嘉嘉表白.當年,悠長的中五暑假,我日間到油站做加油員,晚上去學電腦.加油員這工作,當時是\$4800一個月,對我來說是求之不得.既可以賺學電腦堂費,又可以賺錢買一部電腦.而我做了兩個月加油員後,賺夠了錢,真真正正買了一部電腦.當年的Pentium 3,我開心不已.餘下一個月的時間,我辭去工作,打算休息一下.因為我明白,之後無論會考成功與否,讀高中還是工作都是一個辛苦的過程.

那個月,我有打電話給嘉嘉,想再約她出來.沒有她的兩個月,對我來說實在太長.然而,她說她要做暑期工,沒時間.我不清楚,這是不是藉口,但,從她語氣中,我感覺到,她對我這個沒出色的人很失望.我每天在想,我是否做錯?我一個人去決定我們倆人的事,是否太自私?

好不容易,到了會考放榜日.因為中四,中五有著嘉嘉,我的成績很好.而嘉嘉亦考獲不錯的成績.我倆又再一同升中六了.為了可以每天見到嘉嘉,我已經不會再去諗以往小時候甚麼轉校,甚麼和女生比鬥那些幼稚想法.此時,我已真的察覺,因為嘉嘉,我真的長大了.

我和嘉嘉倆人都很開心,而收成績表當天,我們終於再次同行,走著陪她回家的一段短途了.

我: 呢幾個月,我做暑期工,賺左d錢,買左部電腦呀.而家我終於識電腦啦.(可能而家呢句好柒,因為而家幾歲細路都識用電腦)

可能因為能順利升中六太開心,她好像沒有之前般冷淡.

嘉嘉: 我都有啲,你有冇ICQ呀? Add我丫,我No. 係xxxxxxx

我: 好,我今晚返去開個ICQ 泥Add你

之後,番到去, add左嘉嘉,發覺她原來也不是經常online. 到她online時,她說因為電腦經常俾細妹霸住,無得用.

5. 落幕

過了兩星期, 中六開學, 回到校園. 此時的嘉嘉對我已經不像中四五時般舊好. 或許因為座位相隔得遠, 或許是我令她太失望, 又或許, 她, 已經死了心.

當年, 因為政府開始推行什麼數碼校園計劃, 圖書館設置了很多台電腦. 加上, 原來上到中六有很多空堂, 到圖書館用電腦的機會多了. 然而, 某一天, 又是嘉嘉的朋友, 這個叫阿兒. 她見我正用電腦, 走過來問我.

兒: 聽聞你鍾意嘉嘉個啲, 係咪架?

我:.....

我無回答, 但, 我死穴又來, 就係一俾人提及所愛, 就面紅耳熱.

兒: 咦, 你面紅啲. 我話俾嘉嘉聽先.

果陣心諗, 唉, 世界就係太多呢d人攞風攞雨先至咁亂, 我鍾意邊個關你條Q事咩.

第二天, 我收到嘉嘉的Email, 內容是:

月,
聽阿兒講, 琴日佢問你係咪鍾意我時你面紅啲. 其實我當你係朋友架咋, 你唔好誤會呀. 你個人咁好, 實有大把女仔鍾意啦. (幾年後, 上高登先知呢種情況叫收卡)
嘉嘉

我的回覆是,

嘉嘉,
我明白你意思, 但係, 可唔可以好似以前咁, 我地等埋呢次公開試丫, 俾多次機會我丫.
我地而家咪做住朋友先囉.
月

嘉嘉又回覆,

月,
我地永遠都係好朋友, 而家係, 以後都係.
嘉嘉

然後, 我強忍著, 沒有在同學面前哭出來. 我沒有再回覆她的電郵, 亦不懂得如何去回覆. 只是, 我回到家每次想哭時, 但淚線閉塞. 我當時心中像是有千頓石頭壓著, 想哭, 但哭不出來, 此種感覺令心中的大石更重, 重得我不能承受. 當時, 每天在電腦不停的播著梁詠琪“得不到的愛” .

是夢般感覺 痴醉一生 沒法更改
得不到的愛 最是精彩 也最悲哀
沒法繼續 沒法放手

沒法回頭 沒法再走
心碎以後 仍然想再擁有

無奈復無奈 我雖早知結果
心總放不開 裝不出灑脫
無奈復無奈 這心只因你痴
甘心一再等 裝不出理智
沒法接近你 卻又會愛著你
這感覺痛得要死
明知這刻不可相愛
人仍然期待

每天上學望見嘉嘉,但是,形同陌路.我想和她說話,她亦完全裝作聽不見.或許,我令她太失望.我明白,她已經死心不想再等下去.

經常看到些電影情人要分隔兩地的情節,相隔千里.以前覺得,分隔千里之外,不能相見是十分痛苦.但現在才了解到,比起相隔千里,咫尺天涯才是真正的痛心.

我當時心情真的壞透,也曾萌生過自殺的念頭,很懷疑自己的人生價值.究竟我為什麼要生存在這世界?或者死了可能會痛快一點,心情會好過一點.最後當然沒有付諸實行,因為還有屋企人等著我去照顧.

而我發現,原來,我會考的好成績,完全是因為嘉嘉.現在,中六中七,沒有嘉嘉,我的生活十分枯燥,沒有動力,像是一輛耗盡氣油的車,已經不能再向前走了.我又變回初中時,什麼都不想理會,不想去想的毒男,成績更一落千丈.當時的中毒情況,更是把體育課也變為我的訓覺課.我準備了一大疊沒有日期的家長信,給阿媽簽名.然後,到了體育課就填上日期,稱病不上體育課,然後,獨自躲在一角睡覺.

當時的班主任(名已經忘記)在家長日當著我媽面前跟我說:你考到全級尾二咁既成績,到底點解呀?你以前成績好好,會考仲要係文科班第三高分.點解你而家變成咁呀?

我:我.....會努力架啦

阿媽當時表情很失望,彷彿是覺得,她和阿爸咬緊牙關撐過生活像是白廢.她默不作聲,看上去好像有點心痛.此刻,我記起,我讀書本來就是要為屋企脫貧,讓父母過好生活.我不該只為嘉嘉而讀書.

我用鳴門般堅定的眼神看著Miss和阿媽說:你地放心,下學期,我一定可以考得好好俾你睇.

話雖如此,但始終,沒了嘉嘉,要毒自過活,動力差天共地.

中六,中七就如此毒了過去.

中七的最後一天,大家都到處和同學拍照留念,務求用光圈把中學時光,把中學的死黨,把自己的青春歲月通通凝住.而我,又在圖書館睡覺.這時候,嘉嘉終於走來跟說話.

嘉嘉:果次個Email,點解你唔覆呀?

我(懶懶地): 我都唔知覆你乜野好, 叫我點覆??

嘉嘉看上去有點歉疚.

嘉嘉: 我地做番朋友呀, 得唔得呀?

我: 咁.....我地以後都係朋友? 無得再變?

我是有點過份, 對嘉嘉有點咄咄逼人.

嘉嘉: 你唔好咁啦, 我地就泥要考試架啦, 我見到你而家無晒朋友, 唔同人講野咁耐, 我想泥鼓勵下你呀.

我: 我明妳意思架啦. 明架啦.

然後, 嘉嘉就好似有d失望咁行開左, 可能佢覺得我小氣, 點解佢想做番朋友我都唔肯. 我見到佢咁, 我就補番個Email俾佢.

嘉嘉,
我明白你係為左我好, 想鼓勵我, 亦都明白妳想我地做唔成情侶都可以做番朋友. 但係, 暫時既我, 真係做唔到. 或者, 我地畢業之後, 若果可以, 我地再試下重新開始丫. 我可以無限期等妳.
月

嘉嘉回覆:

月,
對唔住呀, 你唔好等我啦, 我地已經無可能架啦..
嘉嘉

係呢一刻, 我終於正正式式咁死晒心. 然後我覆

嘉嘉,
Ok, 唔緊要啦. 總之, 以後如果有咩要幫手, 我一定會幫你. 唔好忘記我呀. 祝妳以後幸福, 快樂.
月

這個email後, 我們沒再找對方. 之後日子, 就像正正式式挑戰最難的A-Level. 而家想起A-level仍然一額汗.

懷著沉重的心情, 每天繼續溫習作最後衝刺, 好不容易捱過這最艱難時間, A-level終於完結了,

離成績公佈, 仍然有三個月. 因為無所事事, 我有時會自己一個人, 坐車去元朗, 行下以往經常送嘉嘉回家的小路. 望著一對同校的師弟師妹, 像我們當日一樣, 同行回家, 談得興高采烈. 心想, 不知這個師弟會否像我這個沒用的師兄一樣不敢去愛呢?

行至嘉嘉屋企旁邊的那個公園,我同樣坐在長椅之上.看著日落的陽光,照在公園的樹木,小孩在公園吹著肥皂泡,雖然當時正值炎夏,但現在,只有我一個人坐在公園,坐在長椅上,感覺卻很是淒涼.

我在回憶著我和嘉嘉以往的青葱歲月,我們以往如何無所不談,如何互相贈送小禮物,嘉嘉的笑容,嘉嘉的每一個表情,嘉嘉的髮香,通通都在腦海一一浮現.

看見夕陽之下,小孩子吹出的肥皂泡,閃閃發光,自由自在地飛舞.或許我們的過去,就像這些肥皂泡一樣,雖然閃閃發光,漂亮無暇,但是卻不能夠將它留著,握在手裏.

只是短短四年,現在的我,已經不再有當年的孩子氣,已經不能再返回從前和嘉嘉傻氣的時代,我們始終經不起現實和時間的考驗.漸漸地...漸漸地...太陽開始下山了,街燈隨之亮起.當時,我在傻傻的想,若果真的有緣份,或許,我會在街上碰上嘉嘉.

我嘗試在元朗街上漫無目的地行.這個天真的幻想已經是我當時唯一可以用來作我倆緣份未盡的證明.雖然是絕望,但我總希望在這絕望的面前能作一點點無謂的反抗.

行至晚上大約十時多,在開心廣場的門口的巴士站,突然有人在背後搭我膊頭.當時我滿心歡喜,命運終於不再作弄.這一次,無論如何,我一定要表白,說出我的想法,說出我有多愛妳,嘉嘉.然後,一轉身.

我(失望地):肥文?(佢係我中六,中七班其中一個男同學)

文:喂,阿月,好耐無見啦喎,咁夜既

我:你都係啦,攞乜咁夜呀你?(唔通同你講我周圍行撞嘉嘉咩?俾你當變態佬都似)

文:我岩岩番完教會咋麻,泥緊我地教會攞chok墨魚團喎,如果你有時間都可以泥join喎,唔使錢架.

真係天意弄人,我要見既係嘉嘉呀,點解係肥文出現架!!!宗教既野,唔知點解往往在你最絕望,軟弱的時間先至會來招手,好邪!!

我:是但啦,幾時呀?

文:你俾你電話我,我再話你知丫.

我:好呀,xxxxxxx

就係咁,我就上左巴士返屋企.

過幾日,同肥文出海chok墨魚,教會既野,一見有新人就成班走埋泥歡迎.不過,無所謂啦,反正都係想出海散下心.俾一班人煩完一輪之後,肥文走過來.

文:你泥緊有乜做呀?

我:無呀,可能搵份工做下啦,幫補下屋企,賺d洗費丫麻.

文: 搵工呀.....咁你識唔識電腦架? 我做緊份工, 做電腦promoter, 幾好賺架, 我都做緊, 有冇興趣?

我: 好呀, 點玩法呀?

文: 好易架咋, 你企個人係度, 有人問你野就答, 賣到一部機有\$100佣, 賣唔出都有\$60一個鐘底薪, 唔識賣, 去洩老底都好夠呀. 如果係既, 我聽日同我老闆單聲, 然後安排interview啦.

我: 好啦, 咁靠你啦.

就係咁, 呢幾個月我都一直賣電腦, 賺左幾萬蚊. 真係好多謝肥文好介紹. 從果陣開始, 到而家我同肥文一直都係好好既朋友.

話咁快, 到左A-level放榜日, 我接過成績單, 見到成績唔係預期中理想. 始終呢兩年因為同嘉嘉既事, 所以無心機讀書. 之不過都好好彩, 成績都僅僅可以升到大學.

然後, 在校務處門外, 我碰上嘉嘉, 冷冷的問: 你考成點呀?

嘉嘉: 唉, 考得好差呀.

我: 唔好咁啦, 我都唔好得去邊啦.

嘉嘉拿了我的成績表看看後.

嘉嘉: 你而家既成績加埋你會考成績都實升到大學啦. 唉, 我都係要repeat 多啦.

然後, 一班女仔走泥安慰嘉嘉, 嘉嘉亦隨之而去. 眼望住嘉嘉的背影, 越行越遠...越變越小...彷彿感覺到, 她在我生命中即將消失, 而今次, 將會是切切底底地失去. 此刻, 我知我可以入大學, 我已經有能力去捉緊嘉嘉, 把幸福的未來給予嘉嘉. 只不過, 現在的她, 已經不再是當天期盼著我與她手拖手一同跨過小水灘的她了. 現在的她像個陌路人, 有著她自己的路. 我倆從始變成了兩條永不交接的平行線了.

嘉嘉的這份愛是我人生中的一個重要片段, 沒有她, 我不會了解何謂真正的愛, 這份愛以一份純真開始, 以一個遺憾作結. 但因為這份愛, 我的人生變得圓滿. 畢竟人生就是一個嘗盡甜酸苦辣的過程. 我很感謝嘉嘉, 她給我第一次嘗著最甜的, 也給我第一次嘗著最苦的. 她陪著我渡過我的青葱歲月, 在我黑白的中學生涯, 填滿了繽紛的色彩.

6. 再遇

大約兩年後, 在我大學Year 1升Year 2的暑假, 我在ICQ見到嘉嘉online. 我send了一句.

我: hihi, 最近點呀?

嘉嘉: 我repeat完中七, 而家係樹仁讀緊.

我: 咁咪好囉, 讀緊d乜呀?

嘉嘉: xxxxxx (唔記得左)

我: 我想問下呢.....其實.....當年中五暑假, 我無拖你隻手, 你有無嬲我呀?

隔了十分鐘左右, 她才回覆.

嘉嘉: 有咁既事咩? 過左咁耐, 唔記得左lu.

我: 其實當年, 我因為屋企情況, 知道無能力同妳一齊, 所以先至.....

嘉嘉: (打左個笑樣)

我: 你記唔記得, 我曾經講過, 我會無限期等你架? 而家我仲等緊架 (笑樣)

嘉嘉: 對唔住呀..... 我已經有男朋友啦

我: o我, 係呀(笑樣), 咁咪好囉, 咁你男友點識架?

嘉嘉: 佢係我repeat中七果年識既一個男同學泥架, 佢對我好好, 個人好叻架, 而家讀緊XXX大學

我: 咦!!! 幾好啱!!! 恭喜妳呀, 終於搵到妳既幸福啦. (笑樣)

嘉嘉: 多謝!! (笑樣)

我: 不如我地聽晚約出尖沙咀食個飯, 當聚下舊丫

嘉嘉: 好呀, 幾點呀?

我: 聽晚六點, 尖沙咀, 我電話係xxxxxxxx 咁聽日見.

其實, 我想藉這餐飯弄清自己對嘉嘉到底是什麼感覺. 吃過呢餐飯, 我發覺我對眼前既嘉嘉得到幸福, 找到好男友, 真的很開心.

此刻, 我才深深了解到, 真正的愛, 不一定要擁有對方, 只要知道對方得到真正的幸福, 即使你如何孤獨, 亦會覺得開心. 或許我當時也是中了高登的魔咒吧.

同時,我發覺,呢兩年嘉嘉外表亦有好大改變,變得更靚,更成熟.當天的她,穿著一套粉藍色的短袖連身裙,已經沒有再穿白色T-shirt作打底,潔白的一對波鞋,頭髮已經長及腰間,給人是一個清新的少女感覺,以往的可愛小女孩感覺已不復再.

對現在的嘉嘉,我存在的只有友情.因為此次相聚,我已弄清楚,我心中的感覺.我愛的是中四當年,傻氣天真的那份情.

那份情,跨不過當天小水灘,跨不過時代.

那份情,緊緊的貼在我人生相簿中,是一幅很精彩,很漂亮的硬照.

吃過飯後,我送了嘉嘉到車站上車,然後獨個兒行到尖東海旁,看著對岸的夜景.此刻,我已經完完全全將那份情放下在我的中學時代,為我心中的思念正正式式寫上一個句號了.

續集-我的爛Gag女友

沒法開始的愛 - 續集-我的爛Gag女友

<http://www.shikoto.com/article/8507/%E6%88%91%E7%9A%84%E7%88%9BGag%E5%A5%B3%E5%8F%8B.html>